


МАЖБУРИЙ НУСХА

РУҶИЯ ҒОЗИЕВА

НИҒОҲИМГА ЯШИРАЙ ...

«Наманган» нашриёти
2013 йил



84(39)7 - 98. arzo.

ХАЁЛА (Руқия Ғозиева) шеърлари ва газалларида инсоннинг энг нозик ва дилбар туйгуларини қаламга олади. Унинг ташбеҳлари ҳаётий, бадиий топилмалари жозибали.

Китобга киритилган шеърларнинг аксарияти ёшлар ва катталар давраларида бир неча марталаб мухлислар эътирофига сазовор бўлган.

Шоирона фикрлар, таъсирчан ўхшатишлар ва кечинмаларда лирик қаҳрамон ўзининг покиза дунёсини баён қилади.

ХАЁЛанинг шеърлари сизнинг ҳам кўнглингизга йўл топа олади, азиз китобхон!

ISBN - 978 - 9943 - 4208 - 8 - 5

1157 - 3780, 75 - 1580036

НГ _____ 2013
1158- (3,0) - (09)

NO 42261
Ogi

2014/2	Alisker Navoiy
A	nomidagi
998	O'zbekiston MK

ТУЙГУЛАР МАВЖИ

Аёл қалби табиатга ўхшайди: шолланса ойу қуёш-дек ёғду сочиб, дилларни мунаввар этади. Ғам-андухлар қаърида қолса, ғазабланса гўё қора булутлар, ёмғирлар, жалалар тўкади. Ўша аёл шоира бўлса, бу манзара бус-бутун намоён. Сатрларда туйғулар ғужғон ўйнаб, ўқувчи қалбида ёрқин аксадо беради.

Хаёла (Руқия Ғозиева)нинг қўлингиздаги китобини ўқиб, унинг аввалги тўпламларига ҳам хос бедорлик мавжи янада шиддатли тус олганига гувоҳ бўлдим. Шоиранинг ватан, она, муҳаббат, садоқат ва бошқа мавзулардаги назмлари самимийлиги турфа ҳисларга уйғунлиги билан эътиборни жалб этади. Айниқса, ғазалларидаги узоқ изланишлар меваси мумтоз адабиётимиз мухлисларини бефарқ қолдирмайди.

Ашъор қуруқ ва чиройли сўзлар, қофиялар йиғиндиси эмас, балки кишини ҳаяжонга солувчи бадиий тасвирлар, ташбеҳлар, туйғулар такомилдир. Шу жиҳатдан олиб қараганда, шоиранинг «Нигоҳимга яширай» китоби ўқишли, дидимизни уйғотиш ва бойитишга ҳисса қўшади, деб ўйлайман.

Эрмамат НУРМАТОВ,
Ўзбекистонда хизмат кўрсатган
маданият ходими.

ОНАЖОН ВАТАН

Гулларнинг кўксига қўйдиргувчи бош,
Онамдай меҳрибон, ҳақгўй ҳам дилдош,
Кўнглимдайин дилкаш, кўнглимдай сирдош,
Муқаддас меҳрибон, онажон Ватан!

Менинг эртам, менинг танҳомсан ўзинг,
Кўнглимга йўқ малол айтар ҳар сўзинг,
Қандоқ оқлай ахир берган нон-тузинг?
Менга ўзинг иймон, ўзинг жон Ватан!

Гуллаб борар гўзал соғинч юракда,
Юртим садоқатим яхши тилакда,
Иштиқлар кўпдир, толмас билакда,
Бергин яна имкон, меҳрибон Ватан!

Шукуҳинг ҳар азиз дилларга малор,
Сарҳадларинг асрар ўғлонинг бедор,
Хаёл истиқлолинг қуйлайди минг бор,
Сенга бахшида шеър, сенга шон Ватан!

Муқаддас, меҳрибон, онажон Ватан!

ИШҚИМ ВАТАНДИР

Бир сўзки, мунаввар бугун, эртамдан,
Устундир «кўҳи қоф» боғи эрамдан,
Қай бир истиқболу шукуҳинг айтай,
Бари улуғвордир кўнгли эркамдан.

Бу менинг иқболу жону танимдир,
Оҳ, азиз, юрагим - ишқим Ватандир!

Тилимда айлангин мисоли асал,
 Мадҳинг чун битсам оз, минг битта ғазал,
 Алишмам тилло-ю, гуҳарларга гоҳ,
 Сен деб туғилганман аз рўзи азал.
 Бу менинг иқболу жону танимдир,
 Оҳ, азиз, юрагим - ишқим Ватандир!

Яралдинг кўнглимнинг иболаридан,
 Кўрқмасман ғанимнинг иғволаридан,
 Садоқатинг боис, кўкларда бошим,
 Гуллагин меҳнатим имлоларидан.
 Бу менинг иқболу жону танимдир,
 Оҳ, азиз, юрагим - ишқим Ватандир!

Файз бердинг хонадон-турмушимга ҳам,
 Меҳнатим бутлиги нонимда йўқ кам,
 Сенинг бирла мудом яшайман мағрур,
 Тинчлик устивордир, сира бўлмас ғам.
 Бу менинг иқболу жону танимдир,
 Оҳ, азиз, юрагим - ишқим Ватандир!
 Ёнсам ёнай майли, шу тупроқ учун,
 Фидолар бўлмасам туғилдим нечун?
 Бошида кўтарган саждагоҳ юртга,
 Хаёлдек фарзандман севолганим чун.
 Бу менинг иқболу жону танимдир,
 Оҳ, азиз, юрагим - ишқим Ватандир!

ВАТАН

Агарчи сўра жон берайин майли,
 Ҳар зарра тупроғинг тинчлик туфайли,
 Ўзингдан ортиқроқ йўқ малак ҳали,
 Онамдайин азиз, иймоним Ватан,
 Сен беқиёслигим, виждоним Ватан!

Жоним аро бу сўз жонимга малҳам,
Ҳар томчи меҳрингсиз ўрайди алам,
Соғиниб кетаман, соғинч билан ҳам,
Онамдайин азиз, иймоним Ватан,
Сен беқиёслигим, виждоним Ватан!

Чиройли кунларим дунёси ўзинг,
Тоза гул кўнглимнинг зиёси ўзинг,
Жаннат булбулларин гўёси ўзинг,
Онамдайин азиз, иймоним Ватан,
Сен беқиёслигим, виждоним Ватан!

Сўзласам бол бўлиб томилдинг сўздан,
Ҳатто юксакроқсан кўкдан, юлдуздан,
Пок нурларинг тутгил, кетма бу кўздан,
Онамдайин азиз, иймоним Ватан,
Сен беқиёслигим, виждоним Ватан!

ИСТИҚЛОЛ

Бахтиёр дамларинг мени қилар лол,
Йўлларим ёритар бу - бахт, бу - иқбол.
Севиб ҳам ардоқлай, юрагимда қол,
Истиқлол, истиқлол, истиқлол.

Куйлаблар борайин истиқболинг чун,
Жонимни изҳорлар қилмайин нечун?!
Фидо мани - ўзим, сен - Ватан учун,
Истиқлол, истиқлол, истиқлол.

Бобо Машрабларин ардоқлаган юрт,
Туғилгай қайталар, бўлмагай унут.
Кел, кўнгил тоқиға бир ўзингни тут,
Истиқлол, истиқлол, истиқлол.

Химматингда яшар халқим саломат,
Эл-юрт дуосида кулмоқда омад.
Одил Юртбоши бор, бўлмас камомад,
Истиқлол, истиқлол, истиқлол.

Соғинч соғинтирар боққаним сайин,
Инжа хуморингга қонай қандайин?!
Ошиқ хаёл севса, севсин мандайин,
Истиқлол, истиқлол, истиқлол.

ЎЗБЕКИСТОН ҚЎШИҒИ

Ўзбекистон ўзлигим бўлдинг,
Доим ёруғ юзлигим бўлдинг,
Айтар ширин сўзлигим бўлдинг,
Асли кўнгил кўзлигим бўлдинг.

Ўзбекистон, диёрим менинг,
Истиқболинг куйлайман сенинг.

Машраб севди тупроғинг Ватан,
Бобур сизди титроғинг Ватан,
Менга олтин ҳар ёғинг Ватан,
Ўпай пойинг, дудоғинг Ватан.

Ўзбекистон, диёрим менинг,
Истиқболинг куйлайман сенинг.

Саховатинг элларда дoston,
Тинчлик бирла ҳар ён гулистон,
Яшна ўлкам, эй, Ўзбекистон,
Ҳофизингга алёр бу бўстон.

Ўзбекистон, диёрим менинг,
Истиқболинг куйлайман сенинг.

ВАТАН СУРУРИ

Элда кулди шуҳратинг бисёр,
Шундан бахти кулгансан диёр,
Алпомишлар бўлди мадакдор,
Сен бинокор, сенсан пахтакор.
Ўзбекистон, ўзлигим ўзинг,
Айтар ширин сўзлигим ўзинг.

Садоқатда беқиёс юртим,
Қисматингни улуғвор тутдим,
Ҳисларимга яширдим сени,
Тимсолингни куйлаблар ўтдим.
Ўзбекистон, ўзлигим ўзинг,
Айтар ширин сўзлигим ўзинг.

Орзуларга тўлиқ ҳар ёғинг,
Машғал мисол порлар байроғинг,
Истиқлолга юз тутди олам,
Тинчлик бўлди ўткир яроғинг.
Ўзбекистон, ўзлигим ўзинг,
Айтар ширин сўзлигим ўзинг.

Қўли баланд Юртбошинг билан,
Кўҳна шаҳринг Кеҳ, Шошинг билан,
Юксал мудом, эъозларга тўл
Юксак қадр, бардошинг билан.
Ўзбекистон, ўзлигим ўзинг,
Айтар ширин сўзлигим ўзинг.

ЮРТ МАДҲИ

Бағрингда Барчиндек улғайдим, юртим,
Ғам тоши келганда ичимга ютдим.
Номингни улуғлаб кўкларда тутдим,
Янги тонг муборак, Ватан - Онажон!

Безиб ҳатто шовқин шаҳардан,
Кезиб қишлоқ кетдим саҳардан,
Устун дийдор юз минг гавҳардан,
Онам сизни соғиниб кетдим,
Онажоним, соғиниб кетдим...

Меҳрга зор бўлган ҳар куним,
Ёритмади аламлар туним,
Йиғлайвердим чиқармай уним,
Онам сизни соғиниб кетдим,
Онажоним, соғиниб кетдим...

БИРЛА БЎЛ

Ноладин воз кеч азизим,
шоду хандон бирла бўл,
Ҳар қаерда хулқи хуш дўст,
яхши инсон бирла бўл.
Сохта шуҳрат оқибатда
хор этар, хор яхши бил,
Пок тилаклар айла ҳаргиз,
тоза виждон бирла бўл.
Кимки меҳнат марди бўлди
топди обрў-эътибор,
Сев шу элни ҳохи деҳқон,
ҳохи боғбон бирла бўл.
Тўғриларнинг пандин уққим,
тўғрилиқдан сози йўқ,
Юртни де, оламни де, ҳа,
еру осмон бирла бўл.

Она ўлканг ҳоки аъло
ўзга юрт тиллосидан,
Руқия, шу ҳур диёринг,
Ўзбекистон бирла бўл.

СОҒИНМАЙСАН

Соғиндим ўт-олов янглиғ нечун
 сен ҳам соғинмайсан,
 Ўзингдан йўқ менга ортиқ,
 не бўлди кам соғинмайсан.

Йироқсан, тош мисол ёстиқ,
 азобинг бунчалар қаттиқ,
 Висолингни қилиб тортиқ,
 тутиб маҳкам соғинмайсан.
 Наҳот бўлса кутиш бекор,
 аламлардан дилим абгор,
 Ўзим бемор, ўзим бедор,
 кўзимда нам соғинмайсан.

Ёниб кетдим, фироқ жоҳил,
 солар дилга жафо ҳар хил,
 Куйиб охир яро кўнгил тутар
 мотам соғинмайсан.

Сочим - жаллод, ясайди дор,
 осар ҳар кун ҳажр маккор,
 Мени асраб Хаёл бир бор,
 ўзинг бу дам соғинмайсан.

БИР ЙЎҚЛАМАЙ

Бир йўқламай ёр кетдимۇ мендек галосини,
 Ёинки қасддин рад этур аҳду вафосини.

Билмамки, ҳолин сўргучи ё ўзга ёри бор,
 Парволари йўқ тортадур кайфу сафосини.

Турсам фироқда ўртаниб васлига интизор,
Кўрмай ўзини кўрмишам жавру жафосини.

Қайдин дараклаб бормайин, тортдим ситамларин,
Не айб биланким айбламиш бу бедавосини.

Қолсам кўзимда шашқатор ёш, ғамга бойланиб,
Кетди йироқлаб куйдириб топмай давосини.

Бордир уволим бир куни олса сўроғига,
Кимлар Хаёлга етказур қилган хатосини.

ЎЛДИРАР

Қилмай ҳануз карамлар, ишқила зор ўлдира,
бериб озор ўлдира.
Адоси йўқ аламлар, бўйнимда дор ўлдира,
яна бедор ўлдира.

Кулар қоши қаламлар, ситамда борми камлар,
юракка тўлди ғамлар,
Дилимни зор тутамлар, мастонавор ўлдира,
қилиб бемор ўлдира.

Соғинч кўйида бўзлар, ёқмас кўнгилга сўзлар,
парвонаму ой қизлар,
Деб йўлда қолди кўзлар, келмаса бор ўлдира,
бормоққа ор ўлдира.

Тугармикан кутишлар, одат эди келишлар,
дилни эзар кетишлар,
Имтихонму бу ишлар, келмаса хор ўлдира,
мани бекор ўлдира.

Ақлимни олди ағёр, кўринди гули бехор,
 солди кўнгилга ҳар кор,
 Олмоққа жонни хунхор, қасдиму бор ўлдирар,
 балки ночор ўлдирар.

Кўйиб келса қадамлар, кулса-кулар одамлар,
 келмас қайтиб бу дамлар,
 Битса кўздаги намлар, Хаёлни ёр ўлдирар,
 мундоқ хумор ўлдирар.

НОЛА ҚИЛАЙ

Кангулга солса ҳижрон нола қилай,
 Алам бўлса ҳукмрон нола қилай.

Нолаларим етмаса ул қошиға,
 Дилни қучса бу армон нола қилай.

На қилдим зор кўнгилни куйдирадур,
 Билмай гуноҳим ҳайрон нола қилай.

Келмоқлиги бор эди ваъдасида,
 Келмас соҳиби даврон нола қилай.

Кутмоқларим кўзимни ўйдирадур,
 Ёр бўлди кимга меҳмон нола қилай.

Қай бир қоши қаламлар олди ҳушин,
 Билолмайин мен гирён нола қилай.

Ағёра етмасун оҳ, нолаларим,
 Кўчаларида пинҳон нола қилай.

Йўқ қолгали Хаёла олса магар,
 Худога топшириб жон нола қилай.

ХАЙ-ХАЙ ЎЛАН

Хай-ҳай ўлан, ҳай ўлан ўланчиман ёр-ёр,
Кўйингизда девона, тиланчиман ёр-ёр.

Тонг чоғида волалар айлаб фалакни қучдим,
Фигон этгувчи минг ё бирламчиман ёр-ёр.

Бағримни тилиб оташ, ишқ қонига бўялдим,
Жон тиеда-ю ноламни куйловчиман ёр-ёр.

Маили, бу ҳолатимдан кулса кулар ганимлар,
Осмоққа ҳар аламни аргамчиман ёр-ёр.

Кутмоқдаман-ку аммо, лутфингиздан дарак йўқ,
Ёинки сиз, ёки мен алдамчиман ёр-ёр.

Узолмадим кўнгилни кечиб Хаёлингиздан,
Куйиблар оҳингизда аламчиман ёр-ёр.

ОЙ САНАМ

Қайдин бўлибдур пайдо, ой санамо, ой санам,
Яна айлади шайдо, ой санамо, ой санам.

Келар яқин битталаб, қоши қаро гунча лаб,
Бермайгина бир садо, ой санамо, ой санам.

Филмонмикан шўх пари, кетмас кўнгилдан нари,
Ишқидаман мубтало, ой санамо, ой санам.

Бошланди дилда ғавғо, ай, жуда кўп муаммо,
Қанча ошиқу гадо, ой санамо, ой санам.

Тунда ёруғ ой бўлиб, тонгда оқар сой бўлиб,
Келмасмикан мабодо, ой санамо, ой санам.

Гардуни оташига солмоққа жоним,
Тутиб яқоларимдан ютиб кетар ишқ.

Кўриб абгора ҳолим парволари йўқ,
Бугун аҳволи зорим кутиб кетар ишқ.

Тополмайму иложин мандин қутулмак,
Беҳад жавру жафолар тутиб кетар ишқ.

Ситамларин оширмоқ қасдидаму ё,
Қўл бермайин Хаёлга ўтиб кетар ишқ.

КЕЛМАДИНГ

Келгин дедим,йиғлаб-йиғлаб келмадинг,
Жон-жонимни тиғлаб-тиғлаб келмадинг.

Ҳижронларинг қайсаргина кўнглимда,
Лоақал бир сийлаб-сийлаб келмадинг.

Энди дарвеш кулоҳини найларам,
Даллилим сўйлаб-сўйлаб келмадинг.

Неча кечган йиллар ўзи сабримдир,
Битди сабрим, ўйлаб-ўйлаб келмадинг.

Азобларинг арқон солса бўйнима,
Аста бошим силаб-силаб келмадинг.

Таслими жон қилар чоғда Хаёлга,
Битта жонинг улаб-улаб келмадинг.

АЙРОМАН

Фироқлар дудида кўнгил ало сендин мен айроман,
Бу кулфатлар ила қаддим дуто, сендин мен айроман.

Умидлар айласам эй воҳ, келурға йўқмикан йўллар,
Не ўтди айт ўзинг ростим хато, сендин мен айроман.

На билдим на араздур ҳай дағи ҳижрон аламлар ё,
Бугун жондин қилай оё нидо, сендин мен айроман.

Агар ишқда кўйиб жоним ичиб озор шаробингдин,
Чу қилсамда кеча-кундуз дуо, сендин мен айроман.

Сўроқлар кўп бугун дилда, аламни зорлари осмон,
Қилиб ҳар дам кеча-кундуз нидо, сендин мен айроман.

Ғаҳи кўйлаб, ғаҳи йиғлаб Ҳаслдек нолалар бирла,
Нечун тоқатларим тоқу ки то, сендин мен айроман.

ДЕҲҚОНЛАРИМ

Минг яша меҳнат билан толмай азиз деҳқонларим,
Сен каби толмас билакларга битай дostonларим.

Иштиёқ бирла қараб тўймас азиз кўзлар мудом,
Қумсағай бир дам сенингсиз ўтса гар ҳар онларим.

Беқийс зардин либос кийди далам яшнаб яна,
Тоғ этиб хирмонларим, бўлгил улуғ меҳмонларим.

Сенга ёр шону зафар танги бобо деҳқон азал,
Руқиянг битгай ғазал қолмай сира армонларим.

ҚОШИ ҚАРОЙИМ

Қоши қаройим бунчалар бай-бай баҳона айлади,
Дилимни ғам-аламларга боқмай равона айлади.

Сўз келмагай забонима, нигоҳи ўқ бу жонима,
Ёқиб икки жаҳонима, ҳай нотавона айлади.

Келмаса борини нетай, бошим олиб қаён кетай,
Бу ҳолни қандоқ унутай, ўшал девона айлади.

Фигонларим олар уйиб, ўзим ғариб сўйиб-сўйиб,
Не қилса во балки кўйиб, ғунча даҳона айлади.

Ишқида йўқму омадим, дуто бўлибдур қоматим,
Бошимда кўп маломатим, бунча бегона айлади.

Хаёла мубтало экан, васли ани даво экан,
Рафторлари бало экан, ҳажрида ёна айлади.

МЕҲР

Ҳув, қишлоқнинг тупроқ йўлин тўзитган,
Шамол айтгин онам сочин тўзғитган,
Ёлғизоёқ сўқмоқ мендан сир тутган,
Мен қизингман танҳо оҳларинг ютган.

Кумуш тонгларингни соғинчга ўраб,
Чигал хаёлларим тутқазса менга.
Бугун шовқин шаҳар аро ишқ сўраб,
Бу дайди қадамлар етмайди сенга.

Ноҳақ эканлигин билса-да, юрак,
Ўзар илинжларнинг кўйида ҳалак.
Отамни, онамни ҳаққига мудом
Дуолар қилмоқни насиб қил, фалак.

СИЗ АЛДАМАНГ...

Кутавериб кўзим толди,
Дардларимни қалам олди,
Ишқни дилга худо солди,
Сиз алдаманг...

Кетгум дейсиз кетолмайсиз,
Бу азобдан кечолмайсиз,
Қадримга ҳеч етолмайсиз,
Сиз алдаманг...

Сочларимдай узун фироқ,
Айлар мени ҳар дам сўроқ,
Девонаваш кўнгил йироқ,
Сиз алдаманг...

Келмадингиз кўниб қолдим,
Озорлардан қаср солдим,
Фақат сиздан қаҳр олдим,
Сиз алдаманг...

Келмоғингиз пойлаб ўтай,
Кўнглимга ишқ жойлаб ўтай,
Меҳрим фақат сизга тутай,
Сиз алдаманг...

НОЗЛАРИНГИЗ...

Ноз-ла куйдирувчи ёр,
Менга беринг ихтиёр,
Сиз-ла, бўлай бахтиёр,
Нозларингиз ширин-да,
Розларингиз ширин-да.

Кўрмасам бир бўлмас-о,
 Куйгуларим улмас-о,
 Ишққа дилим тўлмас-о,
 Розларингиз ширин-да,
 Нозларингиз ширин-да.

Ёр бу ҳолим хандадир,
 Термулишлар гандадир,
 Соғинишлар мандадир,
 Нозларингиз ширин-да,
 Розларингиз ширин-да.

Кетай қандоқ кўрмасам,
 Ёнингизда турмасам,
 Телбаман-о, куймасам,
 Розларингиз ширин-да,
 Нозларингиз ширин-да.

Нозингиздан тўймадим,
 Маъшуқлигим қўймадим,
 Хаёл бўлиб куйладим,
 Нозларингиз ширин-да,
 Розларингиз ширин-да.

ТУНГА

Алла айтма ёлғончи тун,
 Эртакларинг эшитгим йўқ.
 Очилмаган сирли тугун,
 Аламларим кўксида ўқ.

Умидларга тутай савоб,
 Эркалатар руҳни юрак.
 Не куйларга солма азоб,
 Бу йўлларга қайтсам керак.

Куйдирмагин ҳижрон билан,
 Дилимга хеш фироқларинг.
 Оч, кўзларинг ишққа юзлан,
 Сабрим синар сўроқларинг.

Тўлиб кетди йиғлоқи дил,
 Бу телбага етмас кучим.
 Қўйгил уни бир нола қил,
 Соғинчлардан олай ўчим.

Алла айтма, ёлғончи тун...

СОҒИНГАНИМДА...

Нолаларин қўймайди оҳлар,
 Ҳижронимга йўқдур гувоҳлар.
 Дил уйини чулғаса алам,
 Айт, қайлардан топай паноҳлар

Соғинганимда...

Тополмасман кўнгилга малҳам,
 Сен деб яшар умид ҳали ҳам,
 Тоқатимни синайди ҳижрон,
 Синар икки жаҳонимда ғам

Соғинганимда...

Овутагин дилимни қандоқ?
 Тўнгдир сўзим, сўзларим тўмтоқ,
 Ҳижронзада кафтдек жонимга
 Қадалса бу минг битта қодоқ

Соғинганимда....

Куйгуларда ўлмоқлик хато,
 Ишқ деб яшар ҳаттоки гадо,
 Кел, ўзимни бергил ўзимга,
 Бўлай майли, сени деб адо

Соғинганимда...

СОЧЛАРИ ЖАМАЛАК...

(Халқ оҳангида)

Ҳай сочлари жамалак,
Кийик қоши камалак,
Ўйнатиб дилгинамни
Қараб қўймади малак.

Боқиб-боқиб тўймадим,
Нигоҳимни тиймадим,
Ёр бевафо бўлса ҳам,
Соғинчларни қўймадим.

Етармикан тоқатим?
Бугун йўлга боқмадим,
Ўзи қуйган жонимни
Ҳижронида ёқмадим.

Алданиб зор макрига,
Қайтдим куйиб ҳажрига,
Энди қачон етарман,
Муҳаббатнинг ажрига?

Сўз ўргандим булбулдан,
Кўнгил узмай у гулдан.
Қайсаргина Хаёлни
Ким қайтарар бу йўлдан...

ХАТОЛАР ЎЗИМДАН ЎТИБДИ...

Кўнгилни узолмай кутибман,
Девона ошиқдан ўтибман,
Дардимни ҳижронга тутибман,
Хатолар ўзимдан ўтибди.

Фурсати бор бўлса келар деб,
Сўроқлар сочларим силар деб,
Интизор кутмоғим билар деб,
Хатолар ўзимдан ўтибди.

Яхши-ю, ёмонни куйдириб,
Фироқнинг кўзларин ўйдириб,
Суймаган ёрни-да, суйдириб,
Хатолар ўзимдан ўтибди.

Ағёрга номимни сотса ҳам,
Озорга ўзимни отса ҳам,
Йиғламам аламлар ботса ҳам,
Хатолар ўзимдан ўтибди.

БАКА-БАКА БОЙ

Тиланганим ҳақнинг йўлида,
Мен қул бўлдим кўнгил қўлида,
Қололмасман видо чўлида,
Ёнгинамда сен бор бўлгин, ҳой,
Бака-бака бой, бака-бака бой...

Байтиллоҳга арзим бор бугун,
Қетмоқдаман бошимда тугун,
Йўлларимни тўсиб қўйди тун,
Шу ғанимга ё дор бўлгин, ҳой,
Бака-бака бой, бака-бака бой...

Минг малаклар қўлида китоб,
Эртагида йиғлар моҳитоб,
Келаверар, мағрибдан хитоб,
Сени чорлар бедор хойнахой,
Бака-бака бой, бака-бака бой...

Юраклардан тўкилди араз,
Йўқдир қаҳр, йўқдир ҳеч ғараз,
Йироқларда қолиб кетди арз,
Сенгинага тиланайин жой,
Бака-бака бой, бака-бака бой...

Кутар бугун лайлатул-қадр,
Ишқ кўмилган бир ғариб қабр,
Мунгли дилим осмони абр,
Хаёлимда оқаверар сой,
Бака-бака бой, бака-бака бой...

НАВРЎЗ ҲАҚИДА ҚЎШИҚ

Сойлардайин жўшқин келар бир овоз,
Найчи чалган найнинг ноласида ноз,
Ташрифлари гўзал, гўзал бепардоз,
Дилни соғингани соғинчи наврўз!

Янги тонгни қутлар яллачи булбул,
Косаларин ёриб кўз очади гул,
Баҳор кокилларин силайди кўнгил,
Гулни соғингани соғинчи наврўз!

Яна куйлар кунлар, қўлида дутор,
Бирам дилкаш қўшиқ, бирам мафтункор,
Минг йиллик тарихда, минг бир хислат бор,
Йилни соғингани соғинчи наврўз!

Ёзгин юракларга ширин хотира,
Ҳаёт қўшиқлари тинмасин сира,
Ҳурдай беозорим, ҳурдай бокира,
Элни соғингани соғинчи наврўз!

Дилни соғингани соғинчи наврўз!

СИЗ ҚАЙДАСИЗ...?

Термулишлар бекор бўлди,
 Кўз ҳажрда бедор бўлди,
 Дил жабрдан безор бўлди,
 Сиз қайдасиз...?

Сочларга ҳам қўнли қиров,
 Ҳолинг не деб сўрмас биров,
 Қийнайверар дилни сўров,
 Сиз қайдасиз...?

Тонай десам йўқдур илож,
 Ҳижрон узун етмас қулоч,
 Алам манинг бошимда тож,
 Сиз қайдасиз...?

Унутмадим йиллар ўтиб,
 Фироқ тиглар тутиб-тутиб,
 Ўтди умр сизни кутиб,
 Сиз қайдасиз...?

АЙТИБ ҚЎЙИНГ, ЎША БОЛАГА
 (Халк оҳангида)

Келаман деб алдаб кетади,
 Оҳим муродиға етади,
 Алам маккор мени ютади,
 Нски ўтса дилдан ўтади,
 Айтиб қўйинг, ўша болага.

Соғинганим айтиб қўяман,
 Алдамчини яна суяман,
 Ғамларимни кўзин ўяман,
 Кетиб қолса кутиб тўяман,
 Айтиб қўйинг, ўша болага.

Тушларимга киради кулиб,
Фанимларим олади юлиб,
Оҳ, йиғлагим келади тўлиб,
Кетса гулдай қоламан сўлиб,
Айтиб қўйинг, ўша болага.

Келмоғини кутиб ўлтирай,
Атрофида ўзим ўргилай,
Ширин суҳбат қуриб кулдирай,
Ошиқларин дилин куйдирай,
Айтиб қўйинг, ўша болага.

КУЙДИРМА

Қўй, дил мани куйдирма,
Далли девона ўзим.
Соғинчларда оқдим-о,
Ишққа ўтмади сўзим.

Йўл қараган кўзимда
Нола қилар фироқлар.
Қўймайди ўз ҳолимга,
Нетай, кўнгил сўроқлар?

Куйдим куйгуларингда,
Нолаларим бўлди шеър.
Нигоҳимга яширай,
Дил, ўзингни менга бер!

Бундай кўниб ўтмагин,
Ҳай, дилим, ҳай куйгин-ей...
Жоним олар чоғда ишқ
Бир ўзимни куйдир-ей...
Ҳай, дилим...
Ай, дилим...
Куй дилим...

ЭРТАКЛАР АЙТ...

Эртақлар айт, айтиб алдагин,
Алвастилар бұлмасин унда.
Қилча меҳринг изҳор айлагин,
Ярим кўнглим йиғлаган тунда.

Юрак азоб солар вужудга,
Кетсам сендан нима қолади?
Келмас бўлсанг мен бор ҳудудга
Мақр бағрим тилиб қулади.

Менга раҳминг келмайди бироқ,
Жоним ахир сенинг қўлингда.
Ўкинчимда ухлайди фироқ,
Тойилди дил, тақдир йўлингда.

Озорингда дарёдай тўлсам,
Ҳижронингда қандай шоҳ бўлай?
Ҳеч бўлмаса, ўлмоқчи бўлсам,
Соғинчларинг пойида ўлай.

КЕТАҚОЛ...

Тунд нигоҳ
Юрагимни ўртаб юборди
Оҳ, дедим...
Бардошларим тўкилиб кетди.
Териб олмадим...
Қўлларимда дарз кетган соғинч...
Ярим жон...
Пажмурда танимдан сирғалиб кетди,
Уҳ, жоним...
Мен жуда ҳоридим
Кетақол...
Кетақол...
Кетақол...

ИЛИНЖ

Юрак...
 Сенда бир илинж қолди.
 Бу - умид!
 Вужудимни ўлдириб қўйди,
 Мол-дунё...
 Муҳаббат ҳув, бир ёлғончи
 Ҳис гўс...
 Кетавердим йўлда гало ишқ
 Боқмасдан қиё...
 Тиланмоқда фақат вафони
 Ё, олло дўст-ё...
 Ё олло дўст-ё...

ЭРТАККА ИШОНИБ

Мен эртакка ишонмас эдим,
 Дилни олиб кетди алвасти.
 Тилим кесинг пушмонлар едим,
 Сиздан ҳамон дарак келмасди.

Ёрилтошга сиғмади бу бош,
 Йўқ манзилим адашиб қолдим.
 Дарё мисол оқса-да, кўз ёш,
 Бу йўл аро толиқдим, толдим.

Нонуштага келди деб емиш,
 Ўчоққа ўт қалар жодугар.
 Оҳ, шўргина пенюнам эмиш,
 Топишмоғин топмасам агар.

Ёлғонлари йироқ туюлди,
 Кўзларимга ботмади афсун.
 Қабоқлари ёмон уюлди,
 Мени бахтга элтмади бу тун.

Шум кампирни қолдириб доғда,
 Яна олиб қочди бир оққуш.
 Қанот қоқиб «Кўҳи-қоф» тоғда
 Ташлаб кетди қолдириб беҳуш.

Тун париваш эртагидан дод,
 Қаҳри қаттиқ экан паризод.
 Юрагимни алдаб олди-ю
 Бегимни ҳам қилмади озод.

ДАРД

Кўнглимга озорлар тўкилди,
 Терарга етмади сўзларим.
 Оҳлардан чоклари сўкилди,
 Холимдан айланмас кўзларим.

Санама аламим номи йўқ,
 Қабоқлар уйдирар ўзимга.
 Ўлтирар уйининг томи йўқ,
 Қаҳрлар ёғилар юзимга.

Кипригинг санчилди найзадек,
 Қалқонлар бўлмади қабоғим.
 Пойингда янчилсам майсадек,
 Меҳрингдан топмадим ямоғим.

Алдама, соғинчни йиғлатиб,
 Ёлғонга ишонмай қўйганман.
 Шодлансанг кўнгилни тиглатиб,
 Мен бундай соғинчдан тўйганман.

Ҳали ҳеч ҳаётга тўймадим,
 Яшагим келмоқда куй бўлиб.
 Бир ишқни Хаёлдан қўймадим,
 Ҳавасни қучмадим тўй бўлиб.

ЙИГИТГИНА

(Халқона)

Тунларимда ҳавасим йўқ,
Уйғонаман чўчибгина.
Ҳижрон яна уради дўқ,
Алам кетмас қучибгина.
Қулоқ тутинг, йигитгина,
Ҳасратим бор чигитгина.

Келмоқлари ёлғон экан,
Юрагимга ботди тикан,
Ўтса йигит қарайвердим,
Кўнгил айтар ўшамикан?
Мундоқ ўтинг, йигитгина,
Ҳасратим бор чигитгина.

Йироқ дедим йўлларингиз,
Менда хаёл-ўйларингиз,
Соғинасиз ишонаман,
Етмади ҳеч қўлларингиз.
Келиб қутинг, йигитгина,
Ҳасратим бор чигитгина.

Қўймади бу ўжар юрак,
Ўзи йўқлаб борди тилак,
Энди қўйинг зардаламанг,
Висолингиз менга керак.
Оҳга етинг, йигитгина,
Ҳасратим бор чигитгина.

АСРАСИН

Ўтди йиллар бормадим йўқлаб,
 Фафлат босиб қолдимми ухлаб,
 Бормасам-да, ўзимни оқлаб,
 Дейман, сени худо асрасин.

Йўлим тўсса гоҳ бирор ганим,
 Чораларим йўқ бўлса маним,
 Ё ўзгага зор бўлган дамим,
 Дейман, сени худо асрасин.

Соғинчларда ўйланиб қолсам,
 Ҳижронларда ўртаниб қолсам,
 Кечай қандоқ ўрганиб қолсам,
 Дейман, сени худо асрасин.

Йўлга қараб қолмоқларим бор,
 Кутмоқларим биладан бекор,
 Нолиса-да, бу дилим бедор,
 Дейман, сени худо асрасин.

Юрагимда асорати ишқ,
 Ўтар куним ҳар соати ишқ,
 Излаб Хаёл ҳаловати ишқ,
 Дейман, сени худо асрасин.

СОҒИНЧДА АЙБ...

Келмай йиллар ўтиб кетди,
 Алам дилни ютиб кетди,
 Бу қайғулар ботиб кетди,
 Соғинтирган соғинчда айб.

Силар бошим болишларим,
Йўллар бўлди боқишларим,
Алдолмаган хоҳишларим,
Соғинтирган соғинчда айб.

Озорларнинг қўлида жон,
Азобларга қилар нишон,
Севсанг мени бир бор ишон,
Соғинтирган соғинчда айб.

Топар бўлсанг йўлим сўраб,
Келсанг агар қўлим сўраб,
Берай, майли кўнглим сўраб,
Соғинтирган соғинчда айб.

Ўзим шоҳман, кўнгил асир,
Хаёлимдан кетмас қаҳр,
Айб сенда ҳам эмас ахир,
Соғинтирган соғинчда айб.

СИЗНИ СОҒИНГАНИМДА

Ўзим ошиқ , девона,
Дилим ўртайди ёна,
Топай қандоқ баҳона,
Сизни соғинганимда...

Ҳижрон алам ўртоғи,
Тинмайди ҳеч титроғи,
Ёмон бўлар бу ёғи,
Сизни соғинганимда...

Мани озор кўйдирар,
Нолалардан тўйдирар,
Ўлдирса ноз ўлдирар,
Сизни соғинганимда...

Куйсам оҳда куйдим-о,
 Бугун дилим ўйдим-о,
 Яна ёлғон кулдим-о
 Сизни соғинганимда...

Бўлди жабрлар бисёр,
 Хаёлда йўқ ихтиёр,
 Бир соғиниб келинг ёр.
 Сизни соғинганимда...

ХИЖРОНГА

Қайси гуноҳимга жавоб ситамлар,
 Ёлғон дунёларда шунча қўйибман.
 Ўзимдан кетдимми наҳот у дамлар,
 Билмай юрагимни бериб қўйибман.

Соғинчлар ўрнида лаҳзада мотам,
 Бугун ҳам кўзларим йўл қарар маҳзун.
 Кимга аталгансан мен севган одам,
 Бунчалар алдоқчи ҳижронинг узун.

Яна қанча кутай бундан-да ортиқ,
 Аламлар жонимга санчилган ўқдай.
 Қилча висолингни қилмайин тортиқ,
 Сўроқлаб қўймайсан керагим йўқдай.

Ҳар бир қадамимда сен шунча йироқ,
 Ҳар бир нигоҳимда умидлар соя.
 Бир тишлам жонимни суғирмай фироқ.
 Кел, ўзинг ғамлардан қилгин ҳимоя.

МЕНИ СЕВМАГАН ЙИГИТ

Кетар кўчамдан ўтиб,
Парилар кўлин тутиб,
Ё борлигим унутиб,
Мени севмаган йигит.

Балки синайди ҳолим,
Билмай ночор аҳволим,
Бунча бўлмаса золим,
Мени севмаган йигит.

Парвоси йўқ куйдирар,
Жондан ҳануз тўйдирар,
Бугун ёмон ўлдирар,
Мени севмаган йигит.

Ўзим эдим-ку нисор,
Телба дилимда изҳор,
Бўлмаса- бўлмасин ёр,
Мени севмаган йигит.

Ҳали бир қараб турсин,
Кетсам ўзидан кўрсин,
Гардим ахтариб юрсин,
Мени севмаган йигит.

ОҚИБАТ

Отам эккан шолпоя
Хаёлдан ўтди боя,
Боролмадим ортиниб,
Юрагимда киноя.

Қокил ёзар аламлар,
Ўксиб кетар бу дамлар.
Йўқлаб бормасам бўлмас,
Хафа бўлар одамлар.

На гапга кўнар туйғу,
Қани, ўтинч, у йўқ-ку.
Товонимни титратиб,
Ураб олади қайғу.

Қўлимда чимдим тупроқ,
Ҳидлаб тўймадим бироқ.
Ғамбода бир кўнгилни
Яна қийнайди фироқ.

Шай кўзлар йиғламоққа,
Бағримни тигламоққа.
Бир-да, дилдош тополмам,
Ҳолимни сўйламоққа.

Қолдим қушдай учолмай,
Укинчлардан ўтолмай.
Онам, учовлон акам,
Мен отамни қучолмай.

ФАРҒОНАГА БОРМАДИМ

Дилга тугиб ҳар саҳар,
Ҳаёлларимда сафар,
Қўйиб юбормас шаҳар,
Фарғонага бормадим.

Келақолгин дер инжо,
Юрагимдан олган жо,
Қилгувчи минг илтижо,
Фарғонага бормадим.

Камлик топмас юмушлар,
Кунимда кўп ташвишлар,
Қачон тугаркин ишлар?
Фарғонага бормадим.

Жоним қийноққа нисор,
Боролмадим бўлдим зор,

Соғинчларимда ашъор,
Фарғонага бормадим.

Ваъдалар бериб ёрга,
Дил алданиб аёрга,
Айландимми, айёрга,
Фарғонага бормадим.

Тугамади муаммо,
Дунё ўзи бир кам-о,
Уйлаб қолдим-ку, аммо
Фарғонага бормадим.

Гарчи бу тонгги истак,
Келмайди висол кутсак,
Хаёл, кетайлик, кетсак
Фарғонага бормадим.

НАМАНҒОНГА БИР КЕЛИНГ

Чилвир сочли азобим сизда,
Уша ёмон гуноҳқор биз-да.
Ишқимизни кўрай шу кўзда,
Намангонга бир келинг.

Кулмайгина ҳолимга,
Келақолинг ёнимга.
Бир ўт тушди жонимга,
Намангонга бир келинг.

Дилда айтар сўзим кўп,
Оҳ, келсангиз бўлар хўб.
Ёқиб майли мисли чўп,
Намангонга бир келинг.

Кўнгил асло тўлмайди,
Сиздан кечиб бўлмайди.
Хаёл ишқин куйлайди,
Намангонга бир келинг.

ЯНА СОҒИНИБ КЕЛДИМ

Бўлди нолалар бисёр,
Устимдан кулди агёр.
Нелар бўлса бўлди ёр,
Яна соғиниб келдим.

Баланд кўтариб бошни,
Кўздан аритиб ёшни.
Кўлга олиб бардошни,
Яна соғиниб келдим.

Солиб қийноққа жоним,
Олсанг-да хонумоним,
Куйдирмоғи осоним,
Яна соғиниб келдим.

Юракни олиб дордан,
Асраб ҳар қасди бордан,
Кўнгил узмай дийдордан,
Яна соғиниб келдим.

Дил ўйиб уймасанг ҳам,
Соғиниб қўймасанг ҳам,
Хаёлдай куймасанг ҳам,
Яна соғиниб келдим.

КЕЛ, КЎРМАСАМ БЎЛМАЙДИ

Дил соғиниб қўмсайди,
Ошиқ юрак қўймайди,
Ё, ўзгага кўнмайди,
Кел, кўрмасам бўлмайди.

Тўлди кўнгил хонишга,
Етмас кўчим хоҳишга,
Қандоқ чидай нолишга,
Кел, кўрмасам бўлмайди.

Бўлиб ҳижронга нишон,
Оёқ остида бу жон,
Бугун жоним бир ишон,
Кел, кўрмасам бўлмайди.

Нелар қилай куйдирсанг,
Аламлардан тўйдирсанг,
Хаёл, рози ўлдирсанг,
Кел, кўрмасам бўлмайди.

БУ БАҲОР

Кўнгилни аритар аламдан,
Кўшиғи тонглари уйғотар.
Гўзалки, қошлари қаламдан,
Оҳ, десанг оҳлари ўйнатар...
Нозлари ярашган бу баҳор!

Новдага тақибди кўзмунчоқ,
Ҳув қишдан аламин олибди.
Соғинчдан улашиб бир қучоқ,
Соғиндим қайларда қолибди...
Нозлари ярашган бу баҳор!

Сулувлар тиланган ишқидан,
Тунларда ўлтириб паришон.
Юпатар қолиб ҳар ишидан,
Тутқазиб севгидан бир нишон...
Нозлари ярашган бу баҳор!

Сипқоргинг келади тўйиниб,
Олуца гулобдан қатралар.
Кетар ғам дилингдан куйиниб,
Мунғайган юракка ўт қалар...
Нозлари ярашган бу баҳор!

Айланиб келади мунчалар,
Бўй чўзган чучмома бўйлари.
Борлиққа бўйтумор ғунчалар,
Бунчалар ўйлатар ўйлари...
Нозлари ярашган бу баҳор!

СОҒИНДИНГМИ, МУҲАББАТ?

Хумор қилиб кўзимни,
 Анор айлаб юзимни,
 Ҳам куйдириб ўзимни,
 Соғиндингми муҳаббат?!

Фироқда куйдирарсан,
 Жонимдан тўйдирарсан,
 Ёмонлаб ўлдирарсан,
 Соғиндингми муҳаббат?!

Қайтариб тушларимни,
 Оларсан ҳушларимни.
 Яна кутишларимни,
 Соғиндингми муҳаббат?!

Келмадинг кутганимда,
 Оҳларни ютганимда,
 Энди унутганимда,
 Соғиндингми муҳаббат?!

КУТИШ

Нега менга хат ёзасан айт,
 Қутавериб ўтди ўттиз йил,
 Ёзма мактуб кўнгил учун қайт,
 Айтма фақат жоним сабр қил...

Дил ўртанар бугун қайдасан?
 Соғинчларга ўраган мени.
 Рост сўзингни қачон айтасан,
 Излаб топай қайлардан сени?

Йиллар қараб ўзим гуноҳқор,
 Нега сенга ёқмас бу савол?
 Ранжитдимми нима айбим бор
 Қайси сўзим олгандинг малол?

Сувратинга қарайверишдан
Нигоҳимда ўсади алам.
Ҳадеб дилни аврайверишдан
Ҳоримадинг нега ҳали ҳам.

Ҳаммадан ҳам севгандим кўпроқ,
Қандоқ тониб кетай ўзингдан.
Агар тақдир учратса бироқ,
Аразларинг терай кўзингдан.

ҚИШЛОҚ СОҒИНЧИ

Бугун кўмсаб қолди-ку
Қишлоқдаги йўлакча.
Юрагимга тўлди-ку
Интизорлик бўлакча.

Кутар бечора онам
Шоир қизим келар деб.
Кўпайди-ку баҳонам,
Алам кетмас дилни еб.

Отам сира нолимас,
Тураверар йўл қараб.
Қабоқлари олинмас
Умид сочларин тараб.

Нега кўринмас дейди
Паҳлавоним уч акам.
Дилда бордир шу ният
Кетолмадим ҳали ҳам.

Яна кирди тушимга
Болалиқда қолган қиз.
Қўлим бормас ишимга
Борим ўраб олган ҳис.

Қилди алам-алам-о
 Боролмадим - бормадим.
 Камлик топмади кам-о
 Билганимдан қолмадим.

Бердим ўзимга савол:
 Кўнглим, сўраб қўйгин ҳол?
 Чидай қандоқ ўзинг айт
 Сўраб қўймадинг аҳвол!

Туриб тонгги саҳарлаб
 Қарамай ҳар ёғимга.
 Кетдим йўллар оралаб
 Куч тилаб оёғимга.

Кетдим ташлаб ҳар ишни
 Силтаб қўллар нолишга.
 Хаёлни ҳам кўндирдим
 Шамсиқўлда қолишга.

МЕН ЎЗИМДА...

Ишонмайман ҳеч унутишга,
 Йўлингизга қараб тураман.
 Десангизда вақт йўқ ўтишга,
 Мен ўзимда сизни кўраман.

Раҳим келмас юрагимга ҳам,
 Ҳижронларга бошим ураман.
 Товонимдан сочимгача ғам,
 Шу кўзимда сизни кўраман.

Келмасангиз соғингум тайин,
 Ҳар кунимда минг бор ўламан.
 Кетманг ташлаб, кетманг атайин,
 Мен сўзимда сизни кўраман.

Хайр, сўзин ишлатманг асло,
 Ҳали тушингизга кираман.
 Бўлса ҳамки қўлимда асо
 Юлдузимда сизни кўраман.

ИШОНЧ

Қайлардасиз, бугун азизим?
Мени ўзим, мендан ўзганим.
Юрагимни миҳлаб аламга
Сулувларга кўзин сузганим.

Кўнғироққа йўқдир жавоблар,
Вужудимни ҳасадлар еди.
Ҳижронларда ўлмадим, аммо,
Кўрган борки, девона деди.

Кўп соғиндим, соғиндим бисёр,
Бу севгисиз тайин ўлардим.
Ўйласам-да, айтолмасам-да,
Келишингиз бир кун билардим.

Майли, десам қилсам зардалар,
Қадрим йиғлар бебошлигимга.
Кўнгил берган ўша санамлар,
Ишонмасин ювошлигимга.

Мағлуб бўлиб яшамоқ ёмон,
Ҳурлар ҳали бир ёнда турсин.
Сизни олиб кетаман десам,
Кўнмагани ўзидан кўрсин.

МУҲАММАД ЮСУФГА

Хотирамда кечаги нигоҳ,
Бугун кўнглим йиғлайди ўқсиб.
Кўзни алдар кўксимдаги оҳ,
Нима қилай, Муҳаммад Юсуф?

Келдим излаб кўчаларингга,
Юрагимда аламлар ўсиб.
Айтаймикан, укаларингга,
Нима қилай, Муҳаммад Юсуф?

Суратингга боққаним сайин,
 Фаришталар олдилар тўсиб.
 Энди менга бермаси тайин,
 Нима қилай, Муҳаммад Юсуф?

Ҳар йилдан-да баттар бу йилим,
 Соғинчларим кетмоқда тўзиб.
 Ғамга ботиб қайғули дилим,
 Нима қилай, Муҳаммад Юсуф?

Мен фироқдан қўрқаман ёмон,
 Нима қилдим бир гапни чўзиб.
 Жудоликка бергим келмас ён,
 Нима қилай, Муҳаммад Юсуф?

Муҳаммадни билган одамга,
 Юрагимни берганман узиб.
 Сен сиғмаган ёруғ оламга,
 Нега келдим, Муҳаммад Юсуф?

ДУО

Бир дуо бер Худо-ё,
 Бахтимга кўз тегмасин.
 Соғинчда нола қилсам,
 Ашкимга кўз тегмасин.

Юрагимда Оллоҳ-ё,
 Бўлсин ёрнинг сўроғи.
 Кўз ёрмасин аламлар,
 Куйдирмасин фироғи.

Дилимда иддао-ё,
 Омадим кам бўлмасин.
 Сабрларда бўлай-ё,
 Ғанимларим кулмасин.

Бергин ҳай, ишқ дуо-ё,
 Ёнимда ёр ухласин.
 Ғаним қолиб, дўст қолиб,
 Мани дийдор йўқласин.

СЕВИБ ҚОЛМАСАМ БЎЛДИ

Кутишим гумон бўлиб,
Кетсам ёр томон бўлиб,
Кўрмасам ёмон бўлиб,
Севиб қолмасам бўлди.

Узун тунларда сўроқ,
Келиб кўрмайди бироқ,
Дилни ўртайди фиरोқ,
Севиб қолмасам бўлди.

Кўнгил бериб башорат,
Юрагимда ҳарорат,
Қолмай дилда ҳаловат,
Севиб қолмасам бўлди.

Қаддим мисоли ўроқ,
Қийнайди жонни титроқ,
Бугунгидан-да, кўпроқ,
Севиб қолмасам бўлди.

Қета олмадим йироқ,
Ўзим-ку девонароқ,
Хаёлимдан баттарроқ,
Севиб қолмасам бўлди.

МУНДАРИЖА

ИШҚИМ - ВАТАНДИР

Туйлар мавжи.....	3
Онажон Ватан	4
Ишқим Ватандир	4
Ватан	5
Истиқлол	6
Ўзбекистон кўшиғи	7
Ватан сурури	8
Юрт мадҳи	8
Онажоним	9

ҲАЗАЛЛАР

Бирла бўл	10
Соғинмайсан	11
Бир йўқламай	11
Улдирар	12

Нола қилай	13
Ҳай-ҳай ўлан	14
Ойсанам	14
Сизни кўмсаб ўтавердим	15
Зор ўзим	16
Айласангиз	17
Ишқ	17
Келмадинг	18
Айроман	19
Деҳқонларим	19
Қоши қаройим	20

ТУРФА ШЕЪРЛАР

Мехр	20
Сиз алдаманг	20
Нозларингиз	21
Тунга	22
Соғинганимда	23
Сочлари жамалак	24
Хатолар ўзимдан ўтибди	24
Бака-бака бой	25
Наврўз ҳақида қўшиқ	26
Сиз қайдасиз?	27
Айтиб қуйинг ўша болага	27
Куйдирма	28
Эртақлар айт	29
Кета қол	29
Илинж	30
Эртаққа ишониб	30
Дард	31
Йигитина	32
Асрасин	33
Соғинчда айб	33
Сизни соғинганимда	34
Ҳижронга	35
Мени севмаган йигит	36
Оқибат	36
Фаргонага бормадим	37
Намангонга бир келинг	38
Яна соғиниб келдим	39
Кел, кўрмасам бўлмайди	39
Бу баҳор	40
Соғиндингми, муҳаббат?	41
Кутиш	41
қишлоқ соғинчи	42
Мен ўзимда	43
Ишонч	44
Муҳаммад Юсуфга	44
Дуо	45
Севиб қолмасам бўлди	46

2000 с.ф.м.

Адабий-бадний нашр

ХАЁЛА

НИГОҲИМГА ЯШИРАЙ . . .

Шеърлар

Муҳаррир:	Ж. Муслим
Тех. муҳаррир:	С. Абдуҳамитов
Дизайнер:	А. Нурматов

Теришга берилди 2013 йилнинг 15 октябрь
Босишга рухсат этилди: 2013 йилнинг 20 октябрь
куни

Бичими: 84x108 $\frac{1}{16}$. Шрифт гарнитураси Timtes
New Roman. Нашриёт босма табағи: 3,0
Шартли босма табағи: 3,25. Адади 1000 нусха.
Буюртма № 556

«Наманган» нашриёти.
160108. Наманган шаҳри,
Алишер Навоий кўчаси, 36-уй.
Китобнинг оригинал макети «ЗАКОВАТ» нашриёт
уйи матбаа бўлимида тайёрланиб, МЧЖ босмахона-
сида газета қоғозига офсет усулида босилди.

Корхона манзили: Косонсой шаҳри,
«Чорбоғ» кўчаси, 17-уй